

LUNARI pal 2000

Annus Jubilei



Cesare,

soi content di fati savê che chist an i “Scussòns” àn orût dedicati la cuviartina dal so biel “Lunari pal 2000”, ch’al fevela dai famôs ains sessanta, e cussì mi àn dât l’incaric, viodût ch’a vin passât tanc’ ains insiema inta Pro Loco, di esprimi qualche pinsîr par ricuardâ cui ch’a tu eris e se ch’a tu às fat pal nestri paîs.

Prima però, uli diti che a Romans si sînt simpri plui la tô mancjanza, particolarmentri in chisc’ ultins tîmps, ch’a nò vegnin plui fatis chês bielîs fiestis ch’a ti àn viodût impegnât par duta la vita, e cussì la înt si dispiàrt simpri plui e si cognòs simpri mancul.

Passànt cumò a contâ la tô vita, mi ricuardi ch’a tu disevis simpri, cun braura, di jessi al cuint di cuindis fradis, nassût tal 1916 a Uaniz, in Italia, dal matrimoni tra Quirino e la Cjuta, famèa pûra ma onesta la vuestra, pôc di mangjâ e di vistî, ma plena di bonc’ prinzipis tal rispièt dal Signôr.

Bisugna ancja dî che la tô vita jè stada segnada di chê granda fuarza, virtût, passiòn o malatia (zemût ch’a si ûl clamala), ch’a tu às simpri vût par orê creâ cualchi iniziativa in mût che la înt dal paîs si divertîs. L’era coma un vulcân dentri di te, ch’a ti sburtava a bati ogni strada pur di fâ alc pal paîs e cussì ch’a fevelin ben di lui.

Finida la vuera, difat, tu às cjàpât in gestiòn al “Bar dal Enal” e la granda “Sala Modiano”, dulà ch’a vignivin a balâ di duta la regiòn e ancja dal Venit, clamànt personagjos televisifs in chei tîmps famôs, coma la Bolognani e Dossena.

Simpri in chei ains tu às viàrt ancja “L’estivo Arpa d’oro”, in piazza, tal zardìn da Neef (Uè Tempo), otignînt un grant sucès cul balâ di lunis.

Tal 1957, invezzi, siarada la “Sala Modiano”, tu às partât al bal par Viarsa, (La dai fors, uê ancja lì Tempo), ta “Sala Arlecchino”, altri sucès ch’al à durât fin tal 1962.

Tal 1966 tu às fondât la Pro Loco e inviada la mascherada; tal 1969 tu sês stât tra chei ch’a àn fondât la sezìon dai “Donators

di sanc”; tal 1973 tu às viart al “Cjamp San Sebastian”, dulà ch’a tu às organizât tantis bielîs fiestis che nissun al podarâ mai dismenteâ, coma lis mostris dai flôrs. Va ricuardada ancja la tô granda passiòn pa “Pro Romans”, ch’a ti à viodût president tantis voltis cun sucès. Di te, però, mi ven simpri devant dai voi il ricuart da sagnosis di Santa Elisabeta, cun cheil codaz di fruz ch’a ti zucàvin pal capòt e ti sgarfàvin ta sachetis par cjoti chei bigliez da gjostris ch’a tu tignivis simpri par lôr. Uê, Cesare, mi plasarès continuâ a ricuardâ altris particulars da tô vita, ma lis rîis son finidis, e se ancja il timp al côr e al finaliz par scancelâ dut, nò stâ crodi ch’a si vini dismenteât di te, a scomenzâ dai “Scussòns”.

Cesare, ti saludi cumò cu lis peraulis di un grant poeta antic: “Ca ti sedi lizera la tiara!” Mandi!

Al to amì Edo Calligaris o Edo “Costante”, coma che tù tu mi clamavis.